


# TEZAU LITURGIC

23 IANUARIE

# ACATISTUL SF. MUCENIC AGATANGHEL DE LA ANCIRA



MOSCOVA, 2000



# Акафист святому мученику Агафангелу

## Кондак 1

Возбранному воину Небеснаго Царя, победное знамение в руке приемшему и Господу последствовавшему доблественно, пение всеумиленное вознести дерзаем и, на молитвы того уповающе, в веселии глаголем: радуйся, Агафангеле, мучениче Христов всепрославленный.

## Икос 1

Агафангеле мучениче всеизрядный, молитвами твоими отверзи недостойная уста моя, да возмогу от души похвалы тебе принести и подвиги твоя прославить, и славу твою возгласить, вопиюще сице:

Радуйся, Божиих дарований исполненный,

Радуйся, благодатию Господнею осененный;

Радуйся, Святыя Троицы пречистое селение,

Радуйся, ангельскаго жития уподобление;

Радуйся, силы Божия всеславное явление,

Радуйся, Церкви Христовы похвало и  
утверждение;

Радуйся, суету тленную мира сего  
отринувый,

Радуйся, страстей пламень кровьми  
мученическими угасивый;

Радуйся, Агафангеле, мучениче Христов  
всепрославленный.

### **Кондак 2**

Блаженство вечное унаследовал еси и радости  
небесныя причастие, поношение и злословие и  
смерть за Христа претерпевши, Агафангеле  
всечудне, темже стеною молитв твоих огради  
всех, во умилении приносящих Богу песнь:  
Аллилуиа.

### **Икос 2**

Воспеваеши Господеви песнь нову, во славе  
предстояще престолу Господню купно со всеми  
святыми, ризы своя Кровию Агнца Божия  
убелившими и Его ради страдания приимшими  
и молитву Господу приносящими, сего ради и  
мы, грешнии, пение приносим похвальное:

Радуйся, огнем божественным  
всеразжженный,

Радуйся, светом Истины осиянный;

Радуйся, добродельми светло украшенный,

Радуйся, венцем мученическим увязенный;

Радуйся, небесных ликом похвало  
всерадостная,

Радуйся, христиан православных песнь  
всеславная;

Радуйся, всечудное наше от бед избавление;

Радуйся, вражия злобы преславное  
посрамление.

Радуйся, Агафангеле, мучениче Христов  
всепрославленный.

### **Кондак 3**

Горняго Иерусалима достигл еси, мучениче  
Христов, идеже в незаходимей ныне сияеши  
славе, яко вседоброе украшение язвы и раны за  
Христа прятя носяще и к подвигу  
призываеши и к молитве подвизаеши всех, во  
еже пети Богу: Аллилуиа.

### Икос 3

Дивнаго во святых Своих Бога Израилева прославил еси в житии своем, мучениче всеславне Агафангеле, любве бо ради Господни отверг еси всепрелестнейшую доброту тленную и нетленную славою облеклся еси, яко звезда всесветлая освещаеши путь ко Христу всем, пение приносящим ти:

Радуйся, сопричастниче вечныя радости,

Радуйся, приятиелище божественныя сладости;

Радуйся, всех святых сомолитвениче,

Радуйся, христианом помощниче;

Радуйся, всеславное верных похваление,

Радуйся, сил адских устрашение;

Радуйся, радуйся всякия правды исполненный;

Радуйся, лживыя неправды потребляющий;

Радуйся, Агафангеле, мучениче Христов всепрославленный.

## Кондак 4

Егда предстал еси судищу мучителеву, не убоялся еси убивающих тело, душу же славою нетленною облачающих и ко страстем всерадостно шествовал еси, воспевая Подвигоположника Господа и молитву Ему усердно принося: Аллилуиа.

## Икос 4

Жизнь моя – Христос и смерть мне приобретение есть, - глагола еси мучениче пребезумным, - темже не устрашуся, ниже убоюся страсти ради Господа, страстию Своею врата ада Поправшаго и воскресением Своим и мне воскресение дарующаго и к подвигу мученическому мя ныне призывающаго. Сего ради, мучениче вседоблественный, прими от нас пение сие:

Радуйся, путем тесным в радость Господа возшедый,

Радуйся, вся красная мира сего во уметы вменивый;

Радуйся, учениче Премудрости Божественныя;

Радуйся, грозде все сладкий Лозы  
Благоплодные,

Радуйся, звезда пресветлая неба церковного,

Радуйся, цвете все славный вертограда  
небесного;

Радуйся, подвиги своими всю землю  
осиявший,

Радуйся, терпением своим всех  
наставляющий;

Радуйся, Агафангеле, мучениче Христов  
всепрославленный.

### **Кондак 5**

Злобы адския посрамитель воистину явился  
еси, мучениче все славне Агафангеле, течением  
бо кровей твоих угасил еси пламень  
преисподний и козни демонския попрал еси  
твердостью твоею, темже от страстей избави  
ныне всех, память твою славящих и Богу песнь  
поющих: Аллилуиа.

### **Икос 5**

Истину познал еси Ипостасную, мучениче  
все славне, и от Нея свобожделение приял еси,  
избегл бо еси ловления лукаваго и сетей

диавольских непричастну душу свою соблюл еси,  
темже пением убажжаешься таковым:

Радуйся, божественная мудрости взыскавый,

Радуйся, небесного знания возжелавый;

Радуйся, идольское нечестие отринувый,

Радуйся, истинное богомудрие возлюбивый;

Радуйся, Хлебом жизни вечная насыщенный,

Радуйся, питием бессмертия напоенный;

Радуйся, Бога всем житием твоим  
прославивший,

Радуйся, человекозавистца подвиги своими  
посрамивый;

Радуйся, Агафангеле, мучениче Христов  
всепрославленный.

### **Кондак 6**

Крест Христов, спасаемым силу и славу  
Божью являющий, приял еси и Божественному  
Подвигоположнику последую даже до смерти,  
на Голгофу всерадостно восшел еси и Господа  
ради страсти и смерть прияти сподобился еси,  
Емуже ныне в незаходимей славе песнь  
приносиши: Аллилуиа.

## Икос 6

Лицы ангельския подвиги твоя воспевают и святых всех чини радуются, людие же христоименитии веселия исполняются, новаго молитвенника и предстателя обретающе и славословие сему приносяще:

Радуйся, житием своим светло сияющий,

Радуйся, и нас в доброделании укрепляющий;

Радуйся, весь мир любовью обымающий,

Радуйся, спасения многих взыскующий;

Радуйся, крепкое падающих возведение,

Радуйся, право стоящим утверждение;

Радуйся, путь ко спасению нам  
возвещающий,

Радуйся, враги наша устрашающий;

Радуйся, Агафангеле, мучениче Христов  
всепрославленный.

## Кондак 7

Муки и страсти претерпел еси, Агафангеле предивне, ведяще яко ни скорбь, ни теснота, ни смерть отлучити тя не возмогут от любве Божия,

еяже причаститися сподоби всех, подвиги и страдания твоя прославляющих и песнь о тебе благодарственную Богу приносящих: Аллилуиа.

### **Икос 7**

Не возжелал еси шествовати на совет нечестивых и на пути грешников не стал еси и посреде седалища развращенного пребывания избегл еси, темже блаженство вечное уготовися ти, мужества образе и чистоты воистину сокровище всеславное, и песнь присно воспевается:

Радуйся, подвигом своим ангелов удививый,

Радуйся, терпением своим бесовския дерзости посрамивый;

Радуйся, печи Вавилонския не устрашивыйся,

Радуйся, прещения мучителей не убоявыйся;

Радуйся, росе, еюже огонь безбожия угашается,

Радуйся, море, имже зловерие потопляется;

Радуйся, мечу, злочестие посекающий,

Радуйся, щите, верных защищающий;

Радуйся, Агафангеле, мучениче Христов  
всепрославленный.

### Кондак 8

Очи сердечныя присно имый горе, о земном и  
тленном помышление отринул еси, и кровми  
мученическими ризы своя убеливше, вшел еси в  
селения горняя, Ангелом благим тезоименне,  
идеже непрестанно молитва поется: Аллилуиа.

### Икос 8

Плоть твою духови покорил еси, и язвами  
мученическими украсил и венцем нетления  
увенчал еси, отринув тленность ветхаго  
человека, в новаго облеклся еси, страдальче  
священнейший, сего ради и мы пение приносим:

Радуйся, в ризу правды облек\_ийся,

Радуйся,            благодатных            дарований  
сподобльшийся;

Радуйся, силою Божией укрепляемый,

Радуйся,        светом        лица        Божия        выну  
озаряемый;

Радуйся, волю Господню о тебе всецело  
исполнивый,

Радуйся, Небеснаго Отечества кровьми  
своими достигнувый;

Радуйся, от падений греховных нас  
ограждающий,

Радуйся, на путь правды нас премудре  
наставляющий;

Радуйся, Агафангеле, мучениче Христов  
всепрославленный.

### **Кондак 9**

Разум богопросвещен имеяй воистину,  
предстал еси пред судищем нечестивым и  
кротко веру в Господа распятаго исповедал еси.  
Темже молитвами твоими утверди сердце наше,  
да ничтоже восхощем ведети, точию Господа,  
Емуже слава и похваление подобает: Аллилуиа.

### **Икос 9**

Сила Господня, присно в немощи  
человеческой совершаемая, явлена бысть о тебе,  
Агафангеле всеблаженне, с\_ею бо вооружен,  
посрамил еси державу сопротивнаго и стерл еси  
вся немощныя дерзости демонския, сего ради  
похвалы приносим таковыя:

Радуйся, Пасхи вечныя причастниче,

Радуйся, Царствия Христова наследниче;  
Радуйся, душу свою за Христа положивый,  
Радуйся, подвигом своим нас в Православии  
укрепивый;  
Радуйся, яко оружие Крест Христов приемый,  
Радуйся, тем всезлобную ярость победивый;  
Радуйся, светом небесным души наша  
озаряющий,  
Радуйся, и ныне благословением твоим нас  
осеняющий;  
Радуйся, Агафангеле, мучениче Христов  
всепрославленный.

### **Кондак 10**

Терпения столп был еси, ревнующе о подвизе  
аввы твоего, Климента всеблаженного,  
Агафангеле чудне, сего ради купно с ним и  
венец мученический приял еси и ныне в  
незаходимей сияеши славе, зовуще: Аллилуиа.

### **Икос 10**

Узы и бесчестие и гонение и страсть  
мужественно претерпел еси, Агафангеле  
вседивне, язвы Господа своего на теле носяй,

темже и мы, подвиги твоя похваляюще, венцы  
песенныя сицевыя сплетаем:

Радуйся, Господа всем сердцем возлюбивый,

Радуйся, даже до смерти Ему последовавый;

Радуйся, Христу сораспявыйся всерадостно,

Радуйся, страдания за Него приявый  
безропотно;

Радуйся, Крест Господень на рамена своя  
приемый,

Радуйся, на Голгофу всерадостно возшедый;

Радуйся, страданий Христовых  
мужественный соучастниче,

Радуйся, Воскресения Его благий  
сопричастниче;

Радуйся, Агафангеле, мучениче Христов  
всепрославленный.

### **Кондак 11**

Фараона всегубителя мысленнаго попрал еси  
страстию твоею и всю силу вражию течением  
кровей мученических потопил еси, всемудренне,  
и на колесницу страстей непорочных всед,  
достигл еси Новаго онаго Иерусалима, емуже

Художник и Содетель Бог, идеже и песнь Творцу  
присно воспевається: Аллилуиа.

## Икос 11

Хваления жертву и елей милости возносил еси  
Господеву, двадесять и осмь лет в темнице  
молитву возносяще, последи же сам яко жертва  
непорочна принеслся еси, Агафангеле предивне,  
многия муки приявый, прими же от нас похвалы  
малыя сия:

Радуйся, муки и скорби ни во что же  
вменивый,

Радуйся, узами темничными узы злобы  
сокрушивый;

Радуйся, на колесницу мучений возшедый,

Радуйся, страстьми Царствия Небеснаго  
достигнувый;

Радуйся, одеяние души кровьюми своими  
убеливый,

Радуйся, на брак Агничий прерадостно  
возшедый;

Радуйся, нечестие идольское посрамивый,

Радуйся, венец всеславно мученический приемый;

Радуйся, Агафангеле, мучениче Христов всепрославленный.

### **Кондак 12**

Царей нечестивых и воевод безбожных мужески обличил еси, Царя Небеснаго доблественнейший воине Агафангеле, главы же усечением венец приял еси всеукрашенный, темже купно с Ангелы песнь воспеваеши присно Господу: Аллилуиа.

### **Икос 12**

Шатания языческая и расколов нестроения утоли молитвами твоими, мучениче предивне, и Церковь Христову неврежденну пребыти сотвори, яко да жезлом заступления твоего от волков душехищных избавльшися, Богу благодарение возсылаем и взываем непрестанно:

Радуйся, правды дивное благоухание,

Радуйся, святости чудное сияние;

Радуйся, яко тобою от напастей избавляемся,

Радуйся, яко тобою благодати от Господа сподобляемся;

Радуйся, яко предстательством твоим жизнь вечная обретается,

Радуйся, яко молитвами твоими вера истинная познавается;

Радуйся, от напастей и скорбей нас свободяющий,

Радуйся, от греховных язв исцеляющий;

Радуйся, Агафангеле, мучениче Христов всепрославленный.

### Кондак 13

О мучениче предивный и досточудный, скорби и страдания приемый многоразличныя и подвигом своим в радость Господа своего вшедый, молитвами твоими от всякия скорби изми рабы твоя и избави страстей душевредных, да прославляюще твое предивное о нас заступление, Богу песнь и славословие приносим: Аллилуиа.

